



- SENAT -

Broj: 01-519/18

Sarajevo, 29. 05. 2018. godine

Na osnovu člana 130. Zakona o visokom obrazovanju („Službene novine Kantona Sarajevo“, broj: 33/17) i članom 56. Statuta Univerziteta u Sarajevu, Senat je, na 19. sjednici održanoj 29. 05. 2018. godine, donio sljedeću

## ODLUKU

### I

Usvaja se Pravilnik o nagrađivanju zaposlenika i dodjeljivanju sredstava organizacionim jedincima Univerziteta u Sarajevu na osnovu rezultata naučnog/umjetničkog rada, broj: 01-519-1/18 od 29. 05. 2018. godine.

### II

Pravilnik iz člana I čini sastavni dio ove odluke.

### III

Ova odluka stupa na snagu danom donošenja.

**REKTOR**

*Prof. dr. Rifat Škrijelj*



Dostavljeno:

- Organizacionim jedinicama UNSA
- Savjetu za nauku i umjetnost UNSA
- Odboru fonda za razvoj UNSA
- Službi za NIR/UIR
- U dokumentaciju Senata
- Arhivi



**UNIVERZITET U SARAJEVU  
REKTORAT**

**PRAVILNIK  
O NAGRAĐIVANJU AKADEMSKOG I  
NAUČNOISTRAŽIVAČKOG OSOBLJA I DODJELJIVANJU  
SREDSTAVA ORGANIZACIONIM JEDINICAMA  
UNIVERZITETA U SARAJEVU NA OSNOVU REZULTATA  
NAUČNOG / UMJETNIČKOG RADA**

Sarajevo, maj 2018. godine

Na osnovu člana 130. Zakona o visokom obrazovanju („Službene novine Kantona Sarajevo“, broj: 33/17) u skladu sa članom 56. Statuta Univerziteta u Sarajevu, a na osnovu Strategije razvoja naučnoistraživačkog/umjetničkoistraživačkog rada na Univerziteta u Sarajevu i Prijedloga Savjeta za nauku i umjetnost Univerziteta u Sarajevu od 24. 04. 2018. godine, Senat Univerziteta u Sarajevu je, na 19. sjednici održanoj 29. 05. 2018. godine donio

**P R A V I L N I K**  
**O NAGRAĐIVANJU AKADEMSKOG I NAUČNOISTRAŽIVAČKOG OSOBLJA I**  
**DODJELJIVANJU SREDSTAVA ORGANIZACIONIM JEDINICAMA**  
**UNIVERZITETA U SARAJEVU NA OSNOVU REZULTATA**  
**NAUČNOG / UMJETNIČKOG RADA**

**Član 1.**

**(Svrha i cilj pravilnika)**

Strategijom razvoja naučnoistraživačkog/umjetničkoistraživačkog (NI/UI) rada na Univerziteta u Sarajevu (UNSA) predviđeno je da se izvrsna istraživanja i objavljivanje kvalitetnih publikacija posebno podstiču i nagrađuju. Prva konkretna mjera u svrhu ostvarivanja ciljeva predviđenih ovom Strategijom je uvođenje ovoga Pravilnika. Cilj Pravilnika je napredovanje UNSA i Bosne i Hercegovine na svjetskim rang listama univerziteta i država prema njihovom doprinosu nauci.

**Član 2.**

**(Kriteriji za nagrađivanje)**

- (1) Naučni rad se vrednuje radovima objavljenim u časopisima koje registruje baza podataka Web of Science Core Collection (WoSCC). Uzimaju se u obzir samo radovi sa UNSA u afilijaciji (Univ Sarajevo; razlikovati od Int Univ Sarajevo i Burch Univ Sarajevo), koji su duži od dvije stranice (izuzetno, kraće radove može odobriti Savjet za nauku i umjetnost UNSA) i koji su u WoSCC-u kategorisani kao članci (Document Type: Articles).
- (2) Naučni radovi se razvrstavaju po kvartilima (Q1, Q2, Q3 i Q4 prema Journal Citation Reports (JCR)). Time se postiže ravnopravna zastupljenost svih naučnih oblasti i grupacija UNSA. Listu radova i kandidata iz oblasti nauke sa izvodom iz baze podataka WoSCC Savjetu za nauku i umjetnost UNSA dostavljaju službe UNSA/Rektorata.
- (3) Umjetnički rad se vrednuje na osnovu analize koju Savjetu za nauku i umjetnost UNSA dostavlja Grupacija umjetnosti. Analiza treba da sadrži listu kandidata sa obrazloženjem.
- (4) Nagrađuju se kandidati koji su u radnom odnosu na UNSA/ organizacionoj jedinici UNSA, kao i kandidati koji su istovremeno u radnom odnosu sa UNSA/ organizacionom jedinicom i nastavnom bazom te organizacione jedinice.

**Član 3.**

**(Nagrada za naučni rad)**

- (1) Kandidati skupljaju bodove na osnovu objavljenih naučnih radova koji su razvrstani po kvartilima i to: Q1 – 10 bodova, Q2 – 7 bodova, Q3 – 4 boda i Q4 – 2 boda. Broj bodova za dati rad se dijeli sa brojem koautora toga rada. Ukoliko je objavljeni rad svrstan u više kvartila, kao referentni se uzima bolje rangirani kvartil.
- (2) Kandidati koji imaju 3 boda ili više od 3 boda se nagrađuju na osnovu broja bodova.
- (3) Kandidatima koji imaju manje od 3 boda bodovi se prenose u narednu godinu.

**Član 4.**  
**(Nagrada za umjetnički rad)**

- (1) Dodjeljuje se jedna nagrada za umjetnički doprinos u prethodnoj godini.
- (2) Dodjeljuje se jedna nagrada za višegodišnji doprinos umjetnosti.

**Član 5.**  
**(Nagrađivanje organizacionih jedinica)**

- (1) Dodjeljivanje sredstava organizacionim jedinicama UNSA vršit će se u skladu sa brojem ostvarenih bodova.
- (2) Boduju se radovi koji su u prethodnoj godini objavljeni u časopisima koje registruje baza podataka WoSCC, koji imaju UNSA u afilijaciji, koji su duži od dvije stranice (izuzetno, kraće radove može odobriti Savjet za nauku i umjetnost UNSA) i koji su u WoSCC-u kategorisani kao članci (Document Type: Articles).
- (3) Bodovanje se vrši prema kvartilu u kojem se nalazi časopis u kojem je rad objavljen i to prema pravilu: Q1 – 10 bodova, Q2 – 7 bodova, Q3 – 4 boda i Q4 – 2 boda. Ukoliko je objavljeni rad svrstan u više kvartila, kao referentni se uzima bolje rangirani kvartil. Ako časopis u kojem je objavljen rad registruje baza podataka WoSCC, ali ga ne svrstava ni u jedan od kvartila, taj rad nosi jedan bod.

**Član 6.**  
**(Utvrđivanje liste kandidata, liste organizacionih jedinica i nagrada)**

- (1) U januaru/februaru svake godine Savjet za nauku i umjetnost UNSA utvrđuje listu kandidata i listu organizacionih jedinica za nagrađivanje za naučni/umjetnički doprinos u prethodnoj godini (izuzetak su liste za 2017. godinu koje će biti utvrđene nakon usvajanja ovoga Pravilnika).
- (2) Lista kandidata za nagrađivanje naučnog rada sadrži i broj bodova određen u skladu sa članom 3. Broj bodova za organizacione jedinice se određuje u skladu sa članom 5.
- (3) Službe UNSA/Rektorata utvrđuju novčani iznos nagrada za datu godinu u skladu sa raspoloživim finansijskim sredstvima.

**Član 7.**  
**(Završne napomene)**

Finansijska sredstva za nagrađivanje/dodjeljivanje sredstava prema ovom Pravilniku obezbjeđivat će se iz sredstava Fonda za razvoj UNSA. Nakon integracije UNSA sredstva će se obezbjeđivati sa jedinstvenog računa UNSA. Efekti primjene ovoga Pravilnika će se kontinuirano analizirati i Pravilnik će se po potrebi modificirati i dopunjavati.

**REKTOR**

*Prof. dr. Rifat Škrjelj*

Broj: 01-519-1/18

Sarajevo, 29. 05. 2018. godine

